

四庫全書

子部

欽定四庫全書

太平御覽卷一百二十六

宋 李昉等 撰

偏霸部十

南涼禿髮烏孤

禿髮利鹿孤

禿髮傉檀

南燕慕容德

慕容超

南涼禿髮烏孤

崔鴻十六國春秋南涼錄曰秃髮烏孤河西鮮卑人也  
八世祖疋孤率其部自塞北遷于河西疋孤卒子壽閼立  
壽閼卒孫樹機能立壯果多謀畧太始中殺秦州刺史胡  
列于萬斛堆敗涼州刺史蘇愉于金山又殺涼州刺史  
楊欣于舟嶺盡有涼州之地武帝為之旰食能死從弟  
務丸立丸死丸孫推斤立斤死子思復鞬立部衆轉盛遂  
據涼土鞬卒子烏孤襲位養民務農循結隣好呂光封  
烏孤廣武郡公益州牧左賢王太初元年正月改元自

稱大將軍大單于西平王以弟利鹿孤為驃騎將軍偃擅  
為車騎將軍二年改稱武威王三年正月徙于樂都八  
月孤因酒走馬馬倒傷脇笑曰幾使呂光父子大喜俄  
而患甚顧謂羣臣曰方難未靖宜立長君言終而薨在  
王位三年偽謚武王廟號烈祖

晉書曰禿髮烏孤其先與後魏同出八世祖疋孤率其  
部落自塞北遷于河西其地東至麥田牽屯西至顯羅  
南至澆河北接大漠疋孤子壽闡之在孕母胡掖氏因

寢而產於被中鮮卑謂被為禿髮因而氏焉

禿髮利鹿孤

崔鴻十六國春秋南涼錄曰利鹿孤烏孤弟太初三年八月即位大赦改治西平建和元年正月大赦改年延耆老訪政治二年羣臣固請即尊號不許乃僭稱河西王三年三月寢疾令曰昔我諸兄弟傳位非子者蓋以泰伯三讓周道以興故也武王創踐實厯垂諸樊之謀終能克昌家業者其在車騎乎吾寢疾惛頓是將不濟

內外多虞國機務廣其令車騎經摠百揆以成先王之志薨謚康王葬西平陵

禿髮儁檀

崔鴻十六國春秋南涼錄曰儁檀利鹿孤弟也少機警有才畧建和三年襲位徙號涼王遷于樂都改為弘昌元年秦遣使拜車騎將軍廣武公四年六月秦遣授河右諸軍事涼州刺史鎮姑臧七月譙羣寮于宣德堂仰視而嘆曰古人言作者不居居者不作信矣前昌松太

守孟偉進曰張文王築城苑繕宮廟構此堂為貽厥之  
資萬世之業秦師濟河濯然瓦解此堂之建年垂百載  
十有二主唯信順可以久安仁義可以永固願大王勉  
之檀曰非君無以聞謹言也八月以鎮南大將軍文支  
鎮姑臧檀遷于樂都雖受制于秦車服禮制一如王者  
十一月遷于姑臧嘉平元年十一月僭即涼王位于南  
郊大赦改年嘉平置百官立世子虎臺為太子二年正  
月以子明德歸為中郎將領昌松太守歸焉爽聰悟檀

甚寵之年始十三命為昌高殿賦援筆即成影不移漏  
檀覽而善之擬之曹子建七年僞檀議欲征西乙弗孟  
愷諫曰連年不收上下飢弊南逼熾磐北迫蒙遜今遠  
征雖尅後患必深僞檀曰孤將畧地卿無阻衆謂其太  
子武臺曰今不種多年內外俱窘事宜西行以拯此弊蒙  
遜近去不能卒來旦夕所慮唯在熾磐彼名微衆寡易  
以討禦吾不過一月自足周旋汝謹守樂都無使失墜  
僞檀乃率騎七千西襲乙弗大破之獲牛馬羊四十餘



萬熾磐乘虛來襲一旬而城潰安西樊泥自西平奔告  
僞檀僞檀謂衆曰今樂都為熾磐所陷卿等能與吾籍  
乙弗之資取契汗以贖妻子是所望也遂引師而西衆  
多逃返遣鎮北段苟追之苟亦不還于是將士皆散僞  
檀曰熾磐昔委質於吾今而歸之不亦鄙乎四海之內  
無所容其身何其痛哉吾老矣寧見妻子而死遂歸熾  
磐六月至西平熾磐使郊迎以上賓之禮歲餘為熾磐  
鳩死謚景王時年五十一武臺亦為熾磐所害少子保

周歸魏魏以為張掖王自烏孤太初元年歲在丁酉至  
僂檀薨歲凡十有九年

晉書曰烏孤以安帝隆安九年僭立至僂檀三世凡十  
九年以安帝義熙九年滅

南燕慕容德

崔鴻十六國春秋南燕錄曰慕容德字玄明皝之少子  
皝每對諸宮人言婦人妊娠夢日入懷必生天子公孫  
夫人方妊夢日入臍中獨喜而不敢言晉咸康二年晝

寢生德左右以告方寢而起眇曰此兒易生似鄭莊公  
長必有大德遂以德為名年十二而眇薨哀毀過禮年  
十八長八尺二寸額上有日角偃月重文元璽初封梁  
公建熙初進號安北將軍封范陽王入為魏尹秦滅燕  
徙于長安秦伐涼德請征自効後為張掖太守苻堅伐  
晉垂請德為副堅敗德乃隨垂如鄴垂稱燕王復封范  
陽王建興元年為司隸校尉八年司徒垂臨薨謂太子  
寶曰鄴是舊郡宜委范陽王永康元年以德鎮鄴及寶

失中山奔龍城以德為丞相領冀州承制南夏德曰中山  
既沒魏必乘勝來攻鄴元年正月德率戶四萬三千車二  
萬七千乘自鄴徙滑臺遇風船沒魏軍垂至衆懼欲退保  
黎陽其夕流澌水合是夜濟訖冰亦尋消德大悅改黎陽  
津為天子津德入滑臺趙王麟等九十八人上言令中山  
傾陷龍都蕭條趙魏遺黎鵠企皇澤伏願仰承俯順以安  
宗廟謹上皇帝尊號德許之令曰假順來議且依燕元故  
事統符行帝制奏詔而已改永康三年為元年大赦殊死

已下置百官封進有差寶自龍城南奔至黎陽城西數里  
伏於河西遣中黃門趙思告北地王鍾曰上以去年二月得  
丞相表即自南征殺速骨作逆於乙連今失據來此呼丞  
相奉迎鍾馳使白狀寶遣思迎之後見採樵者知德稱帝  
懼而北奔初苻登既滅登弟廣率所部二千來降拜冠軍  
處之乞活堡至是復叛稱秦德畱撫軍魯陽王和守滑臺  
率眾攻廣斬之和長史李辨殺和以滑臺降魏德曰苻廣  
雖平撫軍失據進有強敵退無所托計將安出尚書潘聰

曰滑臺四通八達非帝王之居青齊沃壤號曰東秦地方  
二千里戶餘十萬四塞之固可謂用武之國德猶豫未  
決於是遣牙門蘇撫問沙門朗公報曰山西絕俗之士不  
應預聞朝議但有待之累非有託無以立陛下今來即朗  
之檀越敬覽潘尚書之議可以興邦撫又問以年世朗以  
周易筮之曰燕哀庚戌撫曰幾何曰年則一紀世則及子  
撫曰何其促乎答曰卦兆然也豈閭人哉撫秘不敢言德  
大悅三月德引而南五月次薛城八月入廣固即皇帝位

於南郊大赦改元為建平元年又曰漢宣憫吏民犯諱故改名朕今增一備字以二字為複名庶開臣子避諱之路於是叙賞有差褒德仕賢新舊咸悅十月太極端門並就以工匠張剛為材官將軍尚方令二年十月徐州刺史潘聰青州刺史鞠仲來朝讌于延賢堂酒酣德嘆謂羣臣曰朕雖寡薄拱已南面在上不驕夕惕于位可稱自古何等主也仲曰陛下中興之聖后少康光武之傳也顧命左右賜仲帛千匹仲疑多陳讓德曰卿知調

朕朕不知戲卿乎卿飾對非實故亦虛言相賞賞不謬  
如何足謝也韓範進曰臣聞天子無戲言忠臣無妄對  
今日之論可謂君臣俱失德大悅賜範絹五十匹三年  
三月德如齊城登營丘望見晏嬰塚顧左右曰禮大夫  
不逼城葬平仲古之一賢人達者而生居近市死葬近  
城豈有意乎青州秀才晏謨對曰孔子稱臣先人平仲賢  
矣豈不知高其梁豐其禮蓋政在家門故儉以矯世生  
居狹隘卒宜擇地而葬乎所以不遠門者猶冀悟平生



意也德悅之三月以太牢祀漢城陽景王廟遂北登社  
首山東望鼎足因目牛山問謨以齊之山川賢否故事  
謨厯對詳辯畫地成圖德深嘉之拜尚書郎五年二月  
夜地震在栖之雞皆驚攪飛散三月德疾動經旬幾于  
不振會前尚書右丞曹默自冀州來奔以白酒解之乃  
瘳以默為御史中丞封永熙侯五年正月兄子超自秦  
還九月汝水竭十一月得疾篤夢魛曰汝既無子何不  
早立超為太子不爾惡人生心戊午引見群臣于東陽

殿議立超為太子俄而震起百寮驚越德亦不安還宮疾甚呼段后公主及超申以後事執超手曰若得至曉更見公卿顧託以汝死無所恨舉目視公主欲有所言竟遂不能段后大言今日召董中書作詔立超開目顧之是夕薨于顯安宮年七十為十餘棺夜分出四門潛瘞山谷莫知其屍所在虛葬于東陽陵謚獻武皇帝廟號世宗在位五年

慕容超

崔鴻十六國春秋南燕錄曰慕容超字祖明德兄北海王納之子秦滅燕以納為廣武太守數歲去官與母公孫太妃就弟德家于張掖德從苻堅南征留金刀辭母而去及垂起兵山東張掖太守苻昌誅納及德之諸子公孫太妃以毫不合刑納妻段氏以懷妊未決執于郡獄獄掾呼延平德之故吏也將公孫及段氏逃于羌中而生超焉公孫氏臨卒授超金刀曰聞汝叔已中興於鄴都吾朽病將沒相見理絕汝脫得東歸可以此刀還

汝叔也後因呂隆歸秦秦徙涼州民于長安超因而東  
歸母謂超曰母子得全濟者呼延氏之力也惠而不報  
天豈祐人乎今雖死吾欲為汝納其女以答厚惠于是  
納之超至長安徻狂行乞由是往來無禁濟陰人宗正  
謙善卜相西至長安賣術于路超行而遇之因就謙相謙  
奇其姿貌超乃內斷于心不告於妻辭母詣灞上乃與  
謙俱歸至諸閹禁自稱張伏生二十日達梁父建平六  
年四月至廣固呈以金刀且宣祖母臨終之言德撫之

號慟超身長八尺腰帶九圍姿器魁傑有類于德德愛之  
名之曰超封北海王拜侍中驃騎大將軍司隸校尉開  
府置佐十一年立為太子己未僭即皇帝位大赦改建  
平六年為太上元年三年七月遣中書令韓範聘秦姚  
興許還超母妻八月秦使兼員外散騎常侍韋宗還聘  
贈以千金超復遣右僕射張華給事中宗正元聘秦送  
大樂伎一百二十人姚興大悅還超母妻十月華發長  
安宗正元先馳反命超悅乃遣征虜公孫五樓率騎二

千迎于境上超親率六宮迎于馬耳關四年正月大赦  
尊父北海穆王為穆皇帝母段氏為皇太后居長樂宮  
妻呼延氏為皇后五年二月晉相劉裕率眾來伐三月  
晉師渡淮超聞晉軍之威自率眾四萬拒戰大敗奔還  
廣固徙郭內民人保小城晉攻陷大城長圍列守超請  
為藩臣以大岷為界裕不許六年正月超登天門朝羣  
臣于城上殺馬以饗將士文武皆有遷授二月尚書悅  
壽開門納晉師超出奔為晉師所執送建康市斬之時

年二十六殺鮮卑王公已下三千餘人以男女萬餘口  
為軍賞始建平元年歲在己亥僭號居齊至為劉裕所  
滅在己酉凡十有一年

晉書曰超在位六年初德以安帝隆安四年僭立至超  
二世凡十一年以義熙六年滅

太平御覽卷一百二十六

欽定四庫全書

太平御覽卷一百二十七

宋 李昉等 撰

偏霸部十一

西秦乞伏國仁

乞伏乾歸

乞伏熾磐

乞伏慕末

北燕馮跋

馮文通

夏赫連勃勃

赫連昌



赫連定

西秦乞伏國仁

崔鴻十六國春秋西秦錄曰乞伏國仁隴西鮮卑人其  
先自漠北南出大陰山五世祖祐鄰者晉太始初率戶  
五萬遷居高平川祐鄰卒子結權立遷于牽屯結權卒子  
利那立利那卒弟祁埒立祁埒卒利那子述延立遷于  
苑川述延卒祁埒子儔太寒立石勒之滅劉曜也懼而  
遷于麥田无孤山太寒卒子司繁立秦始皇中遷于度

堅山建元七年秦將王統來伐司繁率騎三萬拒統于苑川統潛襲度堅山部民五萬餘落悉降于統司繁乃詣統歸降苻堅拜南單于留之長安後以為鎮西將軍鎮勇士川甚有威惠之稱司繁卒國仁代鎮聞堅征晉奔敗國仁收衆至十餘萬又聞堅為姚萇所殺于是自稱大都督大將軍大單于領秦河二州牧改秦建元二十一年為建義元年置武陽苑川等十二郡築勇士都城以居之三年苻登遣使拜國仁大將軍苑川王四年六月

薨偽謚曰烈王廟號烈祖

乞伏乾歸

崔鴻十六國春秋西秦錄曰乞伏乾歸國仁弟雄武有  
度畧國仁薨羣僚以國仁子公府幼稚乃立乾歸為將軍大  
單于河南王大赦改四年為太初元年立邊氏為后以  
南川侯出連乙都為丞相九月遷于金城二年正月苻  
登遣使拜為大將軍金城王六年立子熾磐為太子七  
年登遣使授左丞相河南王假黃鉞加九錫之禮十月

氐王楊定步騎四萬來伐乾歸勒衆而進大敗定軍斬  
定及首級萬有七千于是盡有隴西之地十二月僭稱  
秦王大赦八年呂光來伐歸乃稱藩遣子勃勃為質既  
而悔之十三年秦征西大將軍姚碩德率衆來伐入自  
南安峽乾歸次隴西以拒碩德興潛師繼發乾歸聞兵  
将至率輕騎數千候興俄與中軍相失為興追騎所逼  
戰敗遁歸苑川乃率騎數百馳至允吾禿髮利鹿孤逆  
歸之于晉興乾歸將叛謀泄懼為利鹿孤所害謂其子

熾磐曰姚興將盛吾將歸之今送汝兄弟及汝母為質  
于是送熾磐兄弟于西平乾歸遂奔長安姚興大悅拜  
持節都督河南諸軍事河州刺史歸義侯十四年遣乾  
歸還鎮苑川盡以部民配之十八年正月乾歸至長安  
十九年正月苑川地震裂五月又朝長安二十年姚興  
慮乾歸終為西州之患留拜主客尚書以其子熾磐為  
西夷校尉行河州刺史二十一年熾磐以長安亂將始  
乃招結諸部築城于崦琅山以據之更始元年乾歸隨

姚興如平流熾磐攻抱罕尅之遂遣使來告乾歸乾歸  
奔還苑川遂如抱罕留熾磐鎮之乾歸將衆二萬遷于  
度堅山諸將勸稱王七月僭稱秦王大赦改年置百官  
公卿以下皆復本位四年五月乾歸畋于五谿山有梟  
集于其手乾歸惡之六月為兄子公府所殺公府出奔  
熾磐遷于抱罕遣弟廣武將軍智達追擒公府于嶮岷  
山南輓裂之八月葬乾歸于抱罕平陵偽謚武元王廟  
號高祖

乞伏熾磐

崔鴻十六國春秋西秦錄曰乞伏熾磐乾歸長子乾歸薨自稱大將軍河南王改元為永康元年以尚書令翟勒為相國封拜各有差二年熾磐討吐谷渾別統支旁於長柳川掘達于渴渾川大破之俘獲男女二萬三千五年正月有五色雲起于南山熾磐悅謂羣臣曰吾今年應有所定王業成矣于是繕甲整兵以伺四方之隙五月間僭檀西征率步騎二萬襲樂都僭檀降遂并南涼

兵強地廣十月僭即秦王位置百官立妻禿髮氏為王  
后四年熾磐子元基自長安逃歸拜尚書左僕射建弘  
元年立第二子慕末為太子領撫軍大將軍都督諸軍  
事改元大赦熾磐寢疾顧命太子慕末乃薨于外寢六  
月葬武平陵謚文昭王廟號太祖

乞伏慕末

崔鴻十六國春秋西秦錄曰乞伏慕末字安石熾磐之  
第二子幼而好學有文才建宏元年立為太子熾磐薨



僭即秦王位大赦改年為承弘元年二月立萬載為太子  
三年九月部民多叛慕末焚城邑毀寶器率戶五千東  
徙乃為赫連定所拒遂圍安南十一月魏遣尚書庫結  
率騎五千迎慕末衛軍吉毗固諫以為不宜內徙遂從  
之庫結引還四年赫連定遣其叔北平公韋代率眾一  
萬攻南安城內大飢至人相食侍中乞伏延祚吏部尚  
書乞伏跋踰城奔竄末乃衝壁出降送于上邽及宗族  
五百餘人悉為赫連所誅自國仁建義元年乙酉歲至

辛未四十七年

晉書曰熾磐在位七年而宋氏受禪以宋元嘉四年死  
子慕末嗣在位三年為赫連定所殺始國仁以孝武太  
元十年僭位至慕末四世凡四十有六載而滅

北燕馮跋

崔鴻十六國春秋北燕錄曰馮跋字文起長樂信都人  
其先畢萬之後也子孫食采馮鄉因以氏焉晉永嘉之  
亂祖父和避地上黨父安雄武有器量為慕容永將永滅

跋東徙和龍家於長谷跋夜夢天門開神光赫然燭于  
庭中永康末拜中衛將軍建始元年與二弟結謀襲殺  
慕容熙立高雲為主正始元年以跋為中外都督開府  
儀同三司錄尚書事封武邑公太平元年雲為其幸臣  
離班桃仁所殺帳下督張泰李桑誅班及仁羣臣推跋  
為主僭即天王位大赦令曰義貴適時不必改作故陳  
氏代姜不徙齊號即號燕國改為太平元年追尊祖和  
為元皇帝父安為宣帝子永為太子三年七月以太子

永領大單于內置四輔七年建太學以長樂劉軒營丘  
張熾成周翟崇為博士簡二千石已下子弟年十五以  
上教之十四年宿軍地燃一旬乃滅十七年二月北部  
人趙壽女既嫁化為男娶妻而無子跋問諸羣臣曰此  
何祥尚書左丞傅權對曰漢世雌雞為雄陰變為陽君  
替臣僭之象卒有婦人專寵王莽篡今女為男臣將無  
君之徵跋曰將何以禳之權曰桑穀生朝太戊脩德而  
殷道中興熒惑守心宋景賁躬延齡二紀唯脩身崇善

可以轉禍為福十八年八月立子翼為太子跋戒之曰  
吾聞君人以學為本不學無以立尊敬師傅乃人倫之  
始汝其夙夜乾乾欽承明訓二十二年八月跋寢疾召  
中書監申秀侍中楊哲于內寢謂之曰吾患當不濟卿  
等善相吾子參決萬機九月跋疾甚輦而臨軒命太子  
翼勒兵聽政以脩非常宋夫人規立其子受惡翼聽政  
謂之曰上疾將瘳柰何便欲代父臨天下乎翼性仁弱  
遂還東宮一日三省疾宋夫人矯絕內外遣閤寺傳問

而已翼及大臣皆不得見跋弟弘于是舉壯士數十人  
衷甲入禁中宿衛皆不戰而散宋夫人命閉東閣弘家  
僮庫斗頭徑捷有勇力踰閣而入至于黃堂射殺女御  
一人跋驚懼而薨弘遣使諭告曰天降凶禍大行崩背  
太子不侍疾羣公不奔喪疑有逆謀圖危社稷吾備太  
弟之親遂攝大位以寧國家百官叩門入者進階二等  
太子翼率東宮兵出戰敗退兵皆奔散弘遣使搏死命  
宗正馮哲黃門盧昭典葬事于東宮葬跋于長谷陵偽

謚文成皇帝廟號太祖

馮文通

崔鴻十六國春秋北燕錄曰馮弘字文通跋之季弟高雲篡位拜中領軍封汲郡公太平元年拜尚書右僕射改封中山公遷尚書令司徒錄尚書嗣跋即天王位大興元年正月壬午朔大赦改年二月立夫人慕容氏為皇后二年正月立少子王仁為太子六月有鼠集城西盈數里地中西行至水前銜馬尾後者迭相銜尾而渡

識者以為民遷之象七月魏師來伐神高八月石城邊  
東營丘成周四郡並降魏九月魏師引還徙民四萬餘  
戶而西三年六月魏永昌王來伐五年四月遣右衛孫  
德乞師于宋十二月又遣尚書陽伊請迎于句麗六年  
三月端門崩四月魏又遣侍中建興公虞弼東平公鵠  
青來伐尅白狼句麗將葛居孟光率衆數萬隨陽伊來  
迎屯于臨川尚書令郭生因民之憚遷開門而引魏軍  
魏軍疑而不赴生遂勒衆攻弘弘引句麗兵入自東門



與生戰于闕下生中流矢卒句麗軍既入城取武庫甲以給其衆城內美女皆句麗軍人所掠五月乙卯弘率龍城見戶東徙焚燒宮殿火一旬不絕令婦人被甲居中陽伊等勒精兵于外葛光率騎後殿方軌而進前後八十餘里魏軍追至遼水不擊而還遣使徵弘于句麗後二年為句麗所殺偽諡昭成皇帝自馮跋太平元年歲在乙酉至弘滅亡之歲丙子二十八載

夏赫連勃勃

崔鴻十六國春秋夏錄曰赫連勃勃朔方人匈奴右賢王去卑之後劉元海之族也曾祖父武前趙嘉平中以宗室封樓煩公拜征北將軍丁零中郎將祖豹子後趙建武中拜平北將軍左賢王父衛辰苻堅以為西單于督攝河西諸虜屯于代來城因秦末兵亂遂有朔方之地控弦之士三萬八千姚萇拜辰大將軍河西王大單于魏師來伐辰遣子力侯提率騎二萬拒戰河東為魏所敗遂乘勝濟河攻剋代來執辰殺之勃勃辰第三子奔

秦高平公沒奔于奔于妻之以女姚興以勃勃為持節  
安北將軍五原公配以三交五部鮮卑及雜虜二萬餘  
落鎮朔方時河西鮮卑杜嶮獻馬八千匹于秦濟河至  
大城勃勃留之召其衆二萬襲殺高平公沒奔于而并  
其衆衆至數萬自稱天王大單于大赦改元始十年為  
龍昇元年置百官以匈奴夏后氏之苗裔僭稱大夏以  
大凡右地伐為丞相代公發嶺北民夷十萬于朔方黑  
渠之南營起京城大赦改龍昇七年為鳳翔元年令曰

朕之皇祖北遷幽朔改姓姁氏後從母為劉氏從母姓  
非禮也古之氏族無常王者繫天為子是為徽赫實與  
天連今改姓曰赫連氏庶協皇天之意支庶非正統者  
以鐵伐為氏庶朕宗族子孫剛銳如鐵皆堪伐人二年  
立夫人梁氏為后立子瑱為太子四年九月劉裕滅秦  
入于長安十二月裕留子義真鎮長安而還勃大悅遂  
圖進取之計遣太子瑱率騎二萬南伐長安五年義真  
遣龍驤將軍沈田子率眾逆戰瑱擊敗之退屯列迴堡

八月勃勃進據咸陽劉裕大懼乃召義真東鎮洛陽勃勃入長安正月羣臣勸勃勃稱皇帝三月築壇于灊上

即皇帝位大赦改鳳翔六年為昌武元年冬十月太子

瓚領大將軍雍州牧錄南臺尚書事鎮長安十一月勃

勃還統萬

統萬勃勃所都之城名也

宮殿大成大赦改昌武二年為

真興元年刻石都南頌紀功德四月追尊父衛辰曰桓

皇帝廟號太祖母苻氏為皇太后祖豹子曰宣皇帝魯

祖武曰景皇帝高祖訓兒曰元皇帝五月雨魚于統萬

二年十月起冲天臺于統萬南山欲登之以望長安六年勃勃將廢太子瑱為秦王以酒泉公倫為太子瑱聞將廢已率衆七萬北伐倫倫率騎三萬拒之既戰倫為瑱所敗倫死之太原公昌率騎一萬襲殺瑱率衆八萬五千歸于統萬勃大悅立昌為太子七月勃勃寢疾甚輦升永安殿召羣臣囑以後事薨于永安殿年四十五謚武烈皇帝葬嘉平陵廟號世祖

赫連昌

崔鴻十六國春秋夏錄曰赫連昌一名折勃勃之第三子身長八尺魁岸美姿貌勃勃薨即位于永安臺大赦改真興七年為永光元年七月杏城劉睹川有青石大如馬頭浮在水上逆流而行人見而送之十月魏乘虛來伐三年五月戰于黑渠為魏所敗昌與數千騎奔還魏追騎亦至昌留河內公費連烏提守高平徙諸城民七萬戶于安定以都之四年二月魏軍至安定三月城潰昌奔秦州魏東平公鸞青追擒之送于魏魏封昌秦

王尚始平公主為魏所殺

赫連定

崔鴻十六國春秋夏錄曰赫連定勃勃第五子鳳翔二年封平原公雍州牧鎮長安率衆赴安定封平原王大將軍領司徒昌為魏所擒定遂率遺衆數萬據平原僭稱皇帝大赦改承光四年為勝光元年進征南大將軍白蘭王吐谷渾莫瓚為開府儀同三司河南王十月畋于陰磐登苛藍山而望統萬城泣曰先帝以朕承大業



者豈有今日乎使天假朕年當與諸卿建王季之業俄而有狐羣百數鳴于定傍令射之無所獲定惡之曰此大不善咄咄天道復何言三年二月魏軍來襲十月尅安定進攻平原十一月定遂掠民五萬戶西奔上却四年河南王莫瓚因戎狄之衆東面以爭天下魏遣益州刺史沒利延寧州刺史拾虎率騎三萬來伐遂擒定送于魏勃勃初號龍昇元年歲在丁未至是歲在辛未二十五年也



太平御覽卷一百二十七

欽定四庫全書

太平御覽卷一百二十八

宋 李昉等 撰

偏霸部十二

宋劉裕

劉義符

劉義隆

劉劭

劉駿

劉子業

劉彧

劉昱

劉準

劉裕

徐爰宋書曰高祖武皇帝姓劉氏諱裕彭城緩輿里人  
夜生有神光之異是夕甘露降於墓樹常遊下邳遇一  
沙門于逆旅沙門言及中原故事因云江表尋當喪亂  
高祖曰便遂至亂亡當有拯之者沙門曰拯之者其在  
君乎其意甚至初高祖患手瘡積年未瘳沙門曰此瘡  
難治先有良藥當以相與因出懷中黃散裹留之沙門

既去高祖追而望之倏忽不見以黃散治瘡一傳而愈  
餘散寶藏之被金瘡輒用有驗晉陵人常叟少以占相  
為事其言多驗嘗相高祖曰君當貴為方伯父之又曰  
君相輒進貴不可言唯願富貴無相忘晉末妖賊孫恩  
作亂前將軍劉牢之東討牢之請高祖叅軍事牢之命  
高祖覘賊遠近將勇士數十人會遇賊至乃迎擊之賊  
衆數十高祖所將人多死而戰意方酣奮長刀所殺傷  
甚衆牢之子敬宣疑高祖淹久恐為賊所殺乃輕騎赴

之既而衆騎並至賊遂大崩高祖為流矢所傷信宿而愈自後累被重傷皆弗以為患軍中益加敬憚恩北走海鹽高祖追而翼之築城于海鹽故治恩知城弗可下乃進向滬瀆帝復棄城追之恩乘風浮海奄至丹徒師衆數萬鼓噪登于蒜山居民皆荷擔而走高祖率所領奔擊大敗之投獻赴水死者甚衆恩顛沛僅得還船雖被摧破猶恃衆力遂徑向京師朝廷震懼以高祖為建武將軍下邳太守帥舟師討恩于郁洲復大破之桓玄

從兄循以撫軍鎮丹徒以高祖為中兵叅軍立篡帝位  
循入朝立高祖從至京師立既宿憚高祖威名又悅高  
祖之風儀姿貌語司徒王謐曰昨見劉裕卿不得獨擅  
其清或告立曰劉裕龍行虎步瞻視不凡恐必不為人  
下宜早為之所立曰我方欲平蕩中原使裕以萬人為  
前驅關隴不足定也事定之後當更議之耳高祖乃以  
弟道規沛國劉毅東海何無忌潛謀匡復桓循弟弘為  
征虜將軍鎮廣陵以道規為中兵叅軍劉毅先亦為弘



吏佐遭母憂還京口至是往江北與道規共集義兵高祖會無忌及任城魏詠之劉毅從弟蕃等共謀二十七人并願從者百餘人是時大風暴起丙辰詣朝門義衆馳入稱有詔齊聲大呼吏士驚散即獲桓循斬而徇之與主簿平昌孟昶等帥將士六十人斬弘於廣陵城因收衆濟江立遣頓丘太守吳甫之右衛將軍皇甫敷北拒義軍或曰裕等衆力甚弱豈辦之有成陛下何慮之甚玄曰劉裕足為一世之雄劉毅家無儋石之儲樗蒲一擲百萬何

無忌劉牢之甥酷似其舅共舉大事何謂無成衆推高  
祖為盟主移檄京邑遇吳甫之於江乘甫之玄驍將也  
其兵甚銳高祖躬執長刀入其陣衆皆披靡即斬甫之  
進至羅落橋高祖望賊旗鼓誓衆馳進挺劔指麾光耀  
如電將軍皆莫敢仰視但憑神武爭為先登皆殊死戰  
無不一以當百呼聲動天地風火並起鉦鼓之音震駭京  
邑桓譙等諸軍一時土崩高祖鎮石頭畱百官羣寮宿  
衛各率其職於是推高祖為使持節都督揚徐兗豫青

冀幽并八州諸軍事鎮軍將軍徐州刺史桓玄經潯陽  
江州刺史郭昶之備乘輿法服以資之收畧二千餘人  
挾天子奔于江陵冠軍將軍劉毅輔國將軍何無忌帥  
諸軍南討獲玄大將軍鄭鈐等于桑落洲玄棄衆復挾  
天子西走初益州刺史毛璩遣弟子修之誘玄以入蜀至  
於枚回州益州都護馮遷斬玄首傳于京師天子反正  
詔進位侍中都督中外諸軍事高祖固讓加錄尚書封  
豫章公邑萬戶絹三萬疋鮮卑慕容德僭號於青州德

死從子超襲偽位公抗表北討屠廣固超踰城走獲之  
戮其王公以下約口萬餘馬二千疋夷其城隍獻超于  
京師斬于建康市盧循寇南康廬陵豫章諸郡守皆委  
任奔走馳使徵公公至下邳留船運輜重自帥精銳步  
歸孟昶諸葛長民懼寇之深入欲擁天子過江公弗聽  
昶窮窘無餘圖飲藥而卒羣賊大至公悉出輕利麟艦躬  
提幡鼓命軍衆齊力擊之賊衆大敗追奔逮夜乃收兵  
而歸循等還潯陽公更簡練三軍將進攻討循聞大軍

至欲遁還豫章乃悉力柵斷左里丙申大軍至左里將  
戰公提幡麾以進兵幡竿折遂沉于水衆皆失色公自  
忻笑曰往年覆舟之戰亦幡竿折今復然賊必破矣衆  
乃大悅即攻柵並進循兵雖死戰猶弗能禁諸軍乘勝  
擊之循單舸走劉蕃孟懷玉斬徐道覆于始興傳首京  
師交州刺史杜慧度斬盧循父子函首送都劉毅為  
荊州刺史矜功驕恣公表請討之毅及黨與皆伏誅分  
遣諸軍伐蜀以朱齡石為益州刺史公授以謀畧遂平

成都斬偽蜀王譙縱荊州刺史司馬休之潛結雍州刺史魯宗之宗之得書響應公帥衆軍西討休之不敢戰乃棄城走奔羌羌偽主姚興死子泓新立人情騷擾公乃抗表北伐諸軍入關及秦姚泓戰破之泓肉袒降公至長安長安豐稔帑藏盈積數千萬公先收彝器渾儀土圭之屬獻于京師其餘珍寶珠玉悉以班諸將執姚泓歸之有司斬于建康市公至洛陽常有紫雲見於軍上晉帝乃命有司禪位于王改元熙二年為永初元年

三年正月崩于西殿年六十七

沈約宋書曰高祖諱裕字德興漢楚元王交之後也小字寄奴初高祖家貧嘗負刀逵社錢三萬經時無以還逵逵執錄甚嚴王謚造逵見之乃密以錢代還由是得釋高祖名微位薄盛流皆不與相知唯謚交焉桓玄將篡謚手解安帝璽綬為玄佐命功臣及義旗事建衆並謂謚宜誅唯高祖保持之上清簡寡欲嚴整有法度不事珠玉輿馬之飾後庭無絲竹之音寧州常獻虎魄枕

光色甚麗時將北征以虎魄治金瘡上大悅命擣碎分  
付諸將卒關中得姚興從女有盛寵以之廢事謝晦諫  
即時遣出錢帛皆付外府內無私藏宋臺建有司奏東  
西堂施局脚牀銀塗釘上不許使用直脚牀釘用鉄孝  
武帝大明中環上所居陰室於其處起玉燭殿與羣臣  
觀之牀頭土鄣壁上掛葛燈籠麻繩絺侍中袁粲稱  
上儉素之德故能光有天下克成大業焉

宋書高祖遊京口竹林寺獨卧講堂前上有五色龍章



衆僧見之驚以白帝帝獨喜曰上人無妄言也

述異記曰宋高祖微時常遊會稽過孔靖宅正晝卧有神人衣服非常謂之曰起天子在門既而失之靖遽出適與帝遇延入結交贈遺臨別執帝手曰卿後必當大貴願以嗣身為託帝許之及定京邑靖自山陰令擢為會稽內史

劉義符

徐爰宋書曰少帝諱義符高祖子也高祖崩五月即皇

帝位廬陵王義真明雋秀發朝野屬望而司空徐羨之  
尚書僕射傅亮領軍謝晦等貪弄朝權忌之乃共誣罔  
構成其讞收義真徙於新安郡夏五月徐羨之王弘傳  
亮謝晦檀道濟共謀廢帝露仗入殿時上在華林園寢  
舟中兵士競進殺侍御者二人遂扶上出東閤廢為榮  
陽王一依漢昌邑晉海西故事遂徙于吳郡六月徐羨  
之等使邢安太殺榮陽王於金昌亭年十九

沈約宋書曰羨之等將謀廢立而廬陵王義真輕動多

過不任主四海乃先廢義真然後廢帝侍中程道惠勸立第五皇弟義恭義之不許遣使殺義真於新安殺帝於吳縣帝突走出昌門追者以門闕擊之倒地然後加害

劉義隆

沈約宋書曰太祖文皇諱義隆小字車兒武帝第三子也授西中郎將荊州刺史長七尺五寸博涉經史善隸書少帝廢百官備法駕奉迎即皇帝位改元元嘉元年三年正月司徒錄尚書事揚州刺史徐羨之尚書令護軍將

軍傳亮有罪伏誅遣中領軍到彥之征北將軍檀道濟討荊州刺史謝晦上親帥六師擒晦於延頭送京師伏誅京師疾疫遣使存問給醫藥死者若無家屬賜以棺木十二年大水京邑乘舡二十四年貨貴制大錢一當兩三十年三月遇弒于含光殿年四十七

劉劭

沈約宋書曰劉劭字休遠文帝長子六歲拜為皇太子二十七年有女巫嚴道育自言通靈夫為劫坐沒入奚官劭

姊東陽公主應閤婢王鸚鵡白公主云道育有異術主乃白上召入道育自言服食主及劭皆惑之始興王濬與劭並多過失使道育祈請令不上達遂為巫蠱事泄道育叛亡變服為尼逃匿東宮濬往京口復載將去三十年二月濬自京口入朝復載還東宮有上告云京口有一尼服食出入征北內似嚴道育上使掩錄得二婢云道育隨濬還都上乃使京口送道育二婢須至檢覈廢劭賜濬死濬母潘妃具以告濬濬馳報劭劭因是有異謀其

月二十一日召前中庶子蕭斌告以逆事明旦與斌同載從萬春門入張超之手行弑逆又使人殺潘淑妃潘屯中堂劬即偽位改元嘉三年為太初元年世祖及南譙王義宣隨王誕並舉義兵劬以事委王羅漢魯秀以拒義軍三月十九日義軍至新林二十一日至新亭二十二日劬衆連敗相繼散降五月四日義軍薛安郡等並入殿臧質從廣莫門入同會大極殿前劬穿西垣入武庫即從井中牽出縛劬於馬上防送軍門斬于牙下濬劬

及四子並梟首暴屍於市投劬瘡屍于江張超之為亂  
軍剖腹剝心嚙食其肉焚其骨道育鸚鵡並都街鞭殺  
於石頭四望山下焚屍揚灰于江後史云劬為元凶

劉駿

沈約宋書曰世祖孝武皇帝諱駿字休龍小字道民文  
帝第三子遷南中郎將江州刺史元凶弒逆以為征南  
將軍加散騎常侍上帥衆入討荊州刺史南譙王義宣  
雍州刺史臧質並舉義兵元嘉三十年四月上至于新

亭即皇帝位五月尅京城孝建元年春親祀南郊改元  
大赦詔凡諸守蒞親民之官有申詳舊條勸盡地利力  
田善蓄者具以名聞更鑄四銖錢立子業為太子賜為  
父後者爵一級大明元年正月大赦改元四月京師疾  
疫遣使案行賜給醫藥死而無收斂者官為斂埋諸王  
及妃主庶姓位從公者喪事聽設函門餘悉斷司空南  
兖州刺史竟陵王誕有罪貶爵誕不受命據廣陵反上親  
御六師車駕出頓宣武堂三年七月尅廣陵斬誕初立



馳道自閭闔門至朱雀門又自承明門至於玄武湖七年於博望梁山立雙闕八年閏五月帝崩於玉燭殿年三十五

沈約宋書曰世祖遊幸無度太后六宮常乘副車在後沈懷文與王景文每諫不宜數出嘗同從坐松樹下風雨甚驟景文曰卿可以言矣懷文曰獨言無益宜相與諫之江智淵卧草側亦謂言之為善俄而被召俱入雉塲懷文曰風雨如此非聖躬所宜冒景文又曰懷文所

啓宜從智淵未及有言上方注弩作色曰卿欲効顏峻耶何以恒知人事又曰顏峻小子恨不得鞭其面

劉子業

沈約宋書曰前廢帝諱子業小字法師孝武帝長子也世祖入伐元凶被囚於侍中下省將見害者數矣卒得無恙世祖崩其日太子即皇帝位罷南北二馳道孝建以來所改制度還依元嘉是歲郡大旱甚米一升數百錢京邑亦至百餘永光元年春改元大赦時帝凶悖日

甚誅殺相繼內外百司不保首領先訛言湘中出天子  
帝將南巡荆湘二州以厭之先欲誅除諸叔然後發太  
宗與左右阮佃夫王道隆李道兒密結帝左右壽寂之  
姜產之等十一人謀共廢帝戊午夜帝於華林園竹林  
堂射鬼時巫云見此堂有鬼故帝自射之壽寂之懷刃  
入姜產之為副帝欲走寂之追而殞之時年十七帝幼  
而猶急在東宮母為世祖所責世祖西巡子業啓參承起居書跡不  
謹上讓之子業啓事陳謝上答曰書不長進此是一條

耳聞汝素業都懈獨戾日甚何以頑固乃爾耶帝少好讀書頗識故事自造世祖誅及雜篇章往往有辭采

沈約宋書曰前廢帝景和未召南平王鑠妃江氏入宮使左右於前逼迫之江氏不受命謂之曰若不從當殺汝三子江氏猶不肯於是遣使殺弟敬猷敬淵等鞭妃一百其夕廢帝亦殞

### 劉彧

沈約宋書曰太宗明皇帝彧字休炳小字榮期文帝

第十一子也為雍州刺史景和末上入朝被留停都廢帝  
誅害宰輔殺戮大臣恒慮有圖之者疑畏諸父並拘之  
殿內收上付廷尉一宿被原將加禍害者前後非一既  
而害上意定明旦便應就禍上與腹心阮佃夫李道兒  
壽寂之等密共合謀殞廢帝於後堂建安王休仁便稱  
臣引升西堂御坐召見大諸臣于時事出倉卒上失履  
跣至西堂猶著烏帽坐定休仁呼主衣以白帽代之以  
備羽儀雖未即位凡衆事悉稱令書施行上即皇帝位

大赦天下改景和元年為泰始元年鎮軍江州刺史晉  
安王子勛舉兵反鎮軍長史鄧琬為其謀主雍州刺史  
袁顗帥眾赴之車駕親御六師出頓中興堂司徒建安  
王休仁帥眾軍大破賊斬偽尚書僕射袁顗進討江郢  
雍湘五州平之晉安王子勛並賜死同黨皆伏誅泰豫  
元年四月上大漸袁粲褚淵劉劭蔡興宗沈攸之同被  
顧命上崩于景福殿年三十四帝少而和令丰姿端雅  
早失所生養於路太后宮內大明世諸弟多被猜忌唯

上見親常侍太后醫藥上好讀書愛文義在藩時撰江  
左以來文章志又續衛瓘所注論語二卷行世及即大  
位四方反叛以寬仁待物諸將帥有父兄子弟同逆者  
並授以禁兵委任不異故衆為之用莫不盡力平定天  
下逆黨多被全宥其才者並見授用有如舊臣才學之  
士多蒙引進參究典籍應對左右於華林園講周易常  
自臨聽末年好鬼神多忌諱近讒慝剪落皇枝宋氏之  
業自此衰矣

沈約宋書曰王景文為揚州刺史上既有疾而諸弟並已見殺惟桂陽王休範人才本劣不見疑出為江州刺史慮一旦晏駕皇后臨朝景文自然成宰相門族強威藉元舅之重歲暮不為純臣泰豫元年春上疾篤乃遣使送藥賜景文死手詔曰與卿周旋欲守卿門戶故有此處分

劉昱

沈約宋書曰廢帝諱昱字德融小字慧震明帝長子也



太宗諸子在孕皆以周易筮之即以得之卦為少字故  
帝字慧震立為太子太宗崩皇太子即位元徽元年正  
月改元二年太尉江州刺史桂陽王休範舉兵反賊奄  
至攻新亭壘齊王拒擊大破之越騎校尉張苟兒斬休  
範五年七月戊子夜帝殞於仁壽殿初帝在東宮年五  
六歲時始就學而惰業好嬉戲主師不能禁好緣漆帳  
竿去地丈餘如此者半食久乃下年漸長喜怒無節左  
右有失旨者輒手加撲打徒跣蹲踞以此為常主師以

白太宗上輒敕昱所生嚴加捶訓及嗣位內畏太后外  
憚諸臣猶未得肆志自加元服變態轉興內外稍無以  
制三年秋冬間便好出遊行太妃每乘青篾車隨相檢  
攝漸自放恣太妃不復能禁單將左右棄部伍入市里  
或十里二十里或往營署旦出日暮乃歸四年春夏此  
行彌數京城尅定意志轉驕於是無日不出與左右人  
解僧智張五兒恒相馳逐夜出承明門夕去晨反旦去  
暮歸從者並執鋌矛行人男女及馬驢值無免者民間

憂懼晝夜不敢開門道上行人殆絕常著小袴褶未嘗服衣冠有白梃數枚各有名號鉗鑿錐鋸之徒不離左右常以鐵錐錐人陰破左右人有斂眉者昱大怒令此人袒胛正立以矛刺胛洞骨於耀靈殿上養驢數十頭所自乘馬養於御床側先是民間訛言謂太宗不男昱是李道兒子昱每出入去來常自稱劉統或自號李將軍與右衛翼輦營女子私通每從之遊持數千錢供酒肉之費製露車一乘其上施蓬乘以出入從者不過數十人

羽儀追之恒不及又各慮禍亦不敢追尋唯整部伍別  
在一處瞻望而已凡諸鄙事過目即能鍛金銀裁衣作  
帽莫不精絕未嘗吹篳執管便韻天性好殺以此為歡一  
日無事慘慘不樂齊王潛圖廢立與直閣將軍王敬則  
謀之七月七日昱乘露車從二百許人無復鹵簿羽儀  
往青園尼寺曉至新安寺就曇度道人飲酒醉夕扶還  
仁壽殿東阿檀幄中卧時昱出遊無度省內諸閣皆夜  
不閉宿衛并逃避內外無禁攝王敬則先結昱左右楊

萬年等二十五人謀共取昱其夕王敬則出外王夫見昱醉熟無所知乃與萬年同入檀幄內以昱防身刀斬之提昱首依常行法稱敕開承明門出以首與敬則馳至領軍府以首付齊王乃戎服率左右數十人稱行還開承明門入昱他夕開門門者震懼不敢視至是弗之疑齊王既入曉乃奉太后令奉迎安成王

劉準

沈約宋書曰順皇帝諱準字仲謀小字智觀明皇帝第

三子也封安成王廢帝殞奉迎王入居朝堂壬辰即皇  
帝位昇明元年改元大赦齊王出鎮東城輔政作相三  
年加相國總百揆備九錫之禮四月禪位於齊王壬辰  
帝遜于東郊既而遷居丹陽宮封為汝陰王殂于丹陽  
謚曰順皇帝時年十三

太平御覽卷一百二十八

欽定四庫全書

太平御覽卷一百二十九

宋 李昉等 撰

偏霸部十三

南齊蕭道成

蕭賾

蕭昭業

蕭昭文

蕭鸞

蕭寶卷

蕭寶融



蕭道成

蕭子顯齊書曰太祖高皇帝諱道成字紹伯小字鬪將漢相何二十四世孫也何孫侍中彪免官居東海蘭陵郡於是為蘭陵人太祖以元嘉四年丁卯歲生龍顙鍾聲鱗文遍體儒士雷次宗立學鷄籠山年十三受業治禮記及左氏春秋襲爵晉興男除江夏王大司馬參軍員外郎直閣中書舍人右軍將軍尋陽王反加輔國將軍帥衆東討一日破十二壘轉冠軍將軍持節都督北討

諸軍事鎮淮陰遷督徐兗二州軍事南兗州刺史明帝嫌  
太祖非人臣相民間流言云蕭道成當為天子帝愈以  
為疑遣鎮軍將軍吳喜以三千人北使令喜留軍破釜  
自將銀壺酒封賜太祖戎服出門迎即酌飲之喜還帝  
意乃悅七年徵還京師部下勸勿就徵太祖曰諸卿聞  
於見事主上誅諸弟太子稚弱作萬歲後計何關他族  
唯應速發事緩必見疑今骨肉相害自非靈長之運禍  
難將興方與卿等戮力及還京拜散騎常侍太子左衛

帥時世祖以功當別封贛縣太祖以一門二封固辭不受詔許之加二百戶明帝崩遺詔為右衛將軍領衛尉加兵五百人與尚書令袁粲護軍褚淵領軍劉劭共掌機事加侍中江州刺史桂陽王休範反出頓新亭以拒之加使持節平南將軍給鼓吹一部治新亭城壘未畢賊前軍已至太祖方解衣卧以安衆心索白虎幡登西垣使寧朔將軍高道慶羽林監陳顯達員外郎王敬則浮舸與賊水戰自新亭至赤岸大破之平明乃振旅凱旋

百姓緣道聚觀曰全國家者此公也遷散騎常侍中領軍  
都督二兗徐青冀五州鎮軍將軍南兗州刺史進爵為  
公增邑二千戶與袁粲褚淵劉秉更日入直號為四貴  
四年加尚書左僕射威名既重蒼梧王深相猜忌幾加  
大禍陳太妃罵之曰蕭道成有功於國今若害之後誰  
復為汝著力者乃止楊玉夫等殺蒼梧王迎立順帝太  
祖移鎮東府進侍中司空錄尚書事竟陵郡公進太尉  
都督十六州諸軍事自大明太始以來相承奢侈百姓成俗

太祖輔政罷御府尚方諸飾玩至是又上表禁人間華  
偽雜物不得以金銀為箔馬乘具不得金銀度不得  
織成繡裙道路不得著錦履不得用紅色為幡蓋衣  
服不得翦綵帛為雜花不得以七寶飾樂器不得以  
金銀為花獸不得輒鑄金銅為像又進假黃鉞都督中  
外諸軍事太傅領揚州牧劔履上殿入朝不趨贊拜不  
名署左右長史司馬從事中郎掾屬各四人太尉錄尚  
書事南徐州如故三月進相國總百揆封十郡為齊公

備九錫之禮加璽綬遠遊冠位在諸侯王上四月進爵  
為王又命冕十有二旒建天子旌旗出警入蹕樂舞八  
佾辛卯宋使兼太保淵兼太尉僧虔奉璽綬禪位建元  
元年四月甲午即位於南郊柴燎告天昇壇受禪禮畢  
即建康宮大赦改昇明三年為建元元年封宋帝為汝  
陰王五月汝陰王薨追謚為宋順帝四年三月庚申召  
司徒褚淵左僕射王儉詔曰吾遘疾彌留至于大漸公  
等奉太子如事吾當令太子敦睦親戚委任賢才崇尚

節儉弘宣簡惠則天下之理盡矣壬戌崩於臨光殿年五十六月上謚曰太祖高皇帝上少有大量博涉經史其後經綸夷險不廢素業後宮器物欄檻以銅為飾者改用鉄內殿施黃紗帳宮人著紫皮履欲以身率下移風變俗每曰使我治國十年當使金土同價四月庚寅葬武進大陵

蕭蹟

蕭子顯齊書曰世祖武皇帝諱蹟字宣遠太祖長子也

小諱龍兒生於建康清溪宅其夜陳孝后劉昭后同夢  
龍據屋上故以字上初為尋陽國侍郎辟西曹書佐出  
為贛令尚書庫部桂陽王休範反上遣軍襲尋陽事平  
除晉熙王諮議遷司徒右長史黃門郎散騎常侍江州  
刺史徵拜侍中領軍將軍給鼓吹一部又加持節都督  
京畿諸軍事僕射中軍大將軍開府儀同三司進爵為  
公給班劍二十人齊國建為世子加侍中南豫州刺史  
給油絡車羽像鼓吹以石頭為世子宮置二率坊省服



章一如東宮進為太子及太祖即位為皇太子太祖崩  
上即位乙丑稱先帝遺詔以司徒褚淵錄尚書左僕射  
王儉為尚書令丙申立皇太子妃王氏永明元年正月辛  
亥南郊大赦改元四年正月辛亥藉田禮畢甲寅幸閱武  
堂勞酒小會十一年正月皇太子長懋薨甲午立太孫  
昭業為皇太孫七月上不豫徙居延昌殿登階而殿屋鳴  
咤甚惡之戊寅大漸詔曰始終大數聖賢不免行年六  
十亦復何恨但皇業艱難萬機事重不能無遺慮耳太孫

進德日茂社稷有寄子良善相毗輔思弘治道百辟庶  
僚各奉爾職謹事太孫勿有懈怠知復何言又詔曰我識  
滅之後身著夏衣器服悉不得用寶勿以牲牢為祭祭  
唯設麴茶飯酒脯而已喪禮每存省約不須煩民百官  
六時入臨又顯陽殿玉像諸佛及供養具如別牒可盡  
心禮拜供養自今公私皆不得出家為道及起立塔寺  
以宅為精舍并嚴斷之唯年六十必有道心者聽朝賢  
選序已有別詔是日崩年五十四九月丙寅葬景安陵

帝剛毅有斷為治總大體以富國為先頗不喜遊宴彫綺之事言常恨之未能頓遣臨崩又詔諸凡遊費宜從休息自今遠近薦獻務存節儉珠玉玩好傷工尤重嚴加禁絕

蕭昭業

蕭子顯齊書曰鬱林王昭業字元尚小名法身文惠太子長子也世祖即位封南郡王文惠太子薨立為皇太子孫即位追尊文惠太子為世宗文皇帝隆昌元年正月大赦改元加太傅竟陵王子良殊禮閏月丁卯以鎮軍

大將軍西昌侯鸞即本號開府儀同三司七月癸巳太  
后令曰嗣主持鍾沴氣爰自弱齡入纂鴻業長惡滋甚居  
喪無一日之哀哀經為歡宴之服昏酣長夜萬機斯墮  
社稷危殆有過綴旒鎮軍居正體道國家是賴伊霍之  
舉實寄淵謨便可依舊典以禮廢黜中軍新安王體自  
文皇獻哲天秀宜入嗣鴻業永寧四海外即以禮奉迎  
昭業少美容止好隸書世祖勅皇孫手書不得妄出以  
貴重之甚有令譽王侯五日一問訊世祖帝獨呼昭業

至幄座別加撫問呼為法身甚重愛之時文惠太子禁其起居節其用度昭業謂豫章王妃庾氏曰阿婆佛法言有福德福生帝王家今日見作天子便是大罪左右主師動見拘執不如作市邊屠沽富兒百倍矣及即位極意賞賜動百數十萬每見錢曰昔時思汝一文不得今得用汝未暮年之間世祖齋庫儲錢數億垂盡開主衣庫與皇后寵姬觀之給閹人豎子各數人隨其所欲恣意輦取取寶器以相掊擊破碎之以為笑樂好鬪難密

買雞至數千價世祖御物甘草杖宮人寸斷用之毀世  
祖招婉殿以材賜閹人徐龍駒龍駒尤親幸為後閹舍  
人日夜在六宮房內昭業與文帝幸妃霍氏淫通龍駒勸  
長留內聲言度霍氏為尼以餘人代之皇后亦淫亂齋  
閣通夜洞開內外淆雜無復分別壬辰蕭鸞等率兵  
自尚書入雲龍門戎服加朱衣于上帝在壽昌殿聞外  
有變使閉內殿諸閹人登興光樓望報云見一人戎服  
從數百人在西鍾下須臾蕭鸞領兵先入帝走向愛姬

徐氏房拔劍自刺不中以帛纏出殺之餘黨亦見誅卒  
時年二十一葬以王禮

蕭昭文

蕭子顯齊書曰海陵恭王昭文字季尚文惠太子第二  
子也封林汝公鬱林王即位改封新安王及鬱林王廢  
尚書令西昌侯鸞奉帝纂統延興元年七月丁酉即位  
以尚書令鎮軍大將軍西昌侯鸞錄尚書事揚州刺史  
封宣城郡公十月進為太傅揚州牧加殊禮進爵為王

輔政帝起居皆諮而後行思食蒸魚菜太官以無錄公  
命不與辛亥皇太后令曰嗣主幼冲底政多昧早膺  
厄疾弗克負荷太傅宣城公宜入承寶命式寧宗社帝可  
降封海陵恭王十一月稱王有疾數遣御師覘視乃殞  
之時年十五謚曰恭王

蕭鸞

蕭子顯齊書曰高宗明皇帝諱鸞字景棲始安真王道  
生子少孤太祖撫育恩過諸子在宋世為安吉令有嚴



能之名遷寧朔將軍淮南宣城二郡太守太祖踐祚遷  
侍中封西昌侯建元二年持節冠軍將軍郢州刺史世  
祖即位轉度支尚書侍中領驍騎將軍王子侯舊乘纏  
帷車高宗獨乘下帷儀從如素士遷中領軍左衛將軍  
豫州刺史尚書僕射領右衛將軍武帝遺詔為侍中尚  
書令加鎮軍中書監開府儀同三司海陵王即位為使  
持節都督揚南徐二州諸軍事揚州刺史鎮東府城給兵  
五千人錄尚書假黃鉞中外都督加殊禮進爵為王太后

令廢海陵王以上入纂大位羣臣三請乃受命建武元  
年十月癸亥即皇帝位大赦改元戊子立皇太子寶卷  
賜天下為父後者爵一級二年十月丁卯詔曰軌世去  
奢事因哲后訓物以儉理鏡前書朕思所以遷淳改俗  
反古移風可罷東田毀興光樓并敕水衡量省御乘  
永太元年四月甲寅改元大赦五月以太子中庶子梁王  
為雍州刺史己酉崩于正福殿年四十七帝明審有吏  
材持法無所借大存儉約罷世祖所起新林苑以地還

百姓廢文帝所起太子東田賣之永明中輿輦舁乘剔去金銀還主衣庫太官進食有裹蒸帝曰可四片破之餘充晚食世祖掖庭中宮殿服御一無所改

蕭寶卷

蕭子顯齊書曰東昏侯諱寶卷字智臧高宗第二子建武元年立為皇太子高宗崩太子即位永元元年正月大赦改元辛卯祀南郊詔三品清資官以上應食祿者有二親或祖父母年登七十并給見錢二千貫二年八月

甲申夜宮內失火十二月雍州刺史梁王起義兵于襄陽三年五月丙申合朔事畢以宮人於闕武堂元會皇后正位帝戎服臨視三月南康王寶融即皇帝位于江陵以太子左率李居士總督西討諸軍事屯新亭九月義軍至南州輔國將軍申胄軍二萬人于姑熟奔歸丙辰李居士與義軍戰于新亭敗績十月冀青二州刺史桓和入衛屯東宮乙卯以衆降光祿大夫張瓌先守石頭棄城奔還于是閉宮城自守李居士以新亭降義軍築

長圍守宮城十二月王珍國侍中張稷等帥兵入殿廢  
帝帝在東宮便好弄不喜書學及即位性重澁少言不  
與朝士接唯親信閹人日夜于後堂戲馬五更方睡至  
晡乃起漸出遊走屏逐居民從萬春門遊東宮以東至  
于郊外數十百里皆空家靜室巷陌懸幔為高障置使人  
防守謂之屏除夜出晨反火光照天拜愛姬潘氏為貴  
妃仍以金蓮帖地使妃行于其上曰此步步蓮花也每  
出妃乘卧輿帝騎馬從後著織成袴褶金箔帽執七寶

纏綃戎服急裝不變寒暑凌冒雨雪不避坑阱馳騁渴乏  
輒下馬解取腰邊蠡器酌水飲之復上馬馳去選無賴  
小兒善走者逐馬左右百人常以自隨置射雉場二百  
九十二處翳中帷帳及步障皆緣以紅錦金銀鏤弩牙  
瑇瑁帖箭郊郭四民樵蘇路絕吉凶失時舉疾棄屍不  
得殯葬後宮遭火之後更起仙華神仙玉壽諸殿刻畫  
彫彩麝香塗壁錦幔珠簾窮極綺麗又信鬼神迎神像  
及諸廟雜神皆入後宮禱祀祈福及聞兵入趣出戶闔

人黃泰平傷其膝仆地曰反耶直後張齊斬首送梁王  
稱宣德皇后令依漢海昏侯故事追封東昏侯

唐秘書監虞世南公子先生論云公子曰宋齊二代廢  
王有五并驕淫狂暴前後如一或身被弑戮或傾墜宗  
社豈厥性頑凶自貽非命將天之所棄用僕代業者  
乎先生曰夫木之性直匠者揉以為輪金之性剛工人  
理以成器豈人事乎唯上智下愚特稟異氣中庸之材  
全由訓習自宋齊以來東宮師傅備員而已貴賤禮隔

規獻無由且多以位來升罕由德進善乎哉賈生之言  
昔者成王幼或襁褓之中召公為太保周公為太傅太  
公為太師保則保其身體傅則傳其德義師則導之教  
訓此三公之職也又置三少曰少保少傅少師是與太  
子晏者也故乃孩提有識三公三少因明孝仁義禮以  
道習之不使見惡行選天下之儒士孝悌博聞有道術  
以翼衛之使與太子居處故太子生乃見正事聞正言  
行正道左右前後皆正人也習與正人居猶生長




齊地不能不齊言習與不正人居猶生長楚地不能不楚言也秦使趙高傳胡亥教之訟獄所習者非斬劓人則夷人之三族也故胡亥今日即位明日殺人有忠諫者謂之誹謗深計者謂之妖言視殺人如刈草菅然豈胡亥之性惡哉彼其導之者非其理也故選左右裨教之最急此五君者稟凡庸之性無周召之師遠益友之箴規狎不端之近習以斯下質生而楚言覆國亡身理故然也

蕭寶融

蕭子顯齊書曰和帝諱寶融字智昭高宗第八子建武  
元年封隨郡王永元元年改封南康王出為荊州寧益  
梁南北秦七州諸軍事西中郎將荊州刺史蕭穎胄殺  
巴西郡太守劉山陽奉王舉兵以雍州刺史蕭衍為使  
持節都督諸軍事左將軍以蕭穎胄為右將軍督行諸  
軍事夏侯亶自京師至江陵稱宣德皇后令南康王宜  
纂成國祚光臨億兆方俟清宮未即大號可且封十郡

為宣城公加相國荊州牧又加黃鉞蕭穎胄為左長史  
進號鎮軍蕭衍進號征東將軍己巳羣寮上尊號中興  
元年正月乙巳即皇帝位大赦改元以相國左長史蕭  
穎胄為尚書令領軍將軍蕭偉為雍州刺史十二月建  
康城平皇太后令以蕭偉為大司馬錄尚書事驃騎大  
將軍揚州刺史封建安郡公依晉武陵王遵承制故事  
百僚致敬二年正月皇太后臨朝入居內殿以大司馬  
蕭衍都督中外諸軍事加殊禮進位相國總百揆揚州

牧封十郡為梁公備九錫之禮位在諸王上二月進梁  
公爵為王增封十郡建天子旌旗出警入蹕三月丙辰  
遜位于梁丁卯梁奉帝為巴陵王徙姑熟戊辰薨年十  
五追為和帝葬恭安陵



太平御覽卷一百二十九